

“Gnothaich

Bhoirionnach”

Le CAIRISTIONA NICAOIDH.

“**C**HA deanar beanas tighe air fraighibh fàsa.” Cha mhotha na sin a nithear beanas tighe air sporan gann! Ach a réir obair cùntais cuid de dh’ àrd luchd foghlaim Oilthigh Oxford, ’s coltach gun gabh rudan miorbhuileach a dhèanamh le beagan thasdan. Agus rud nas iongantach air fad, tha mnathan ann —mnathan Gallda, creidibh—a tha a’ cur leotha. An do leugh sibh anns a’ phàipear naidheachd mu na beachdan a tha aig cuid air biadh fir airson seachdain. Thig e beò air ochd-deug ’s sia sgillinn, tha e coltach, agus abradh sibhse gun rachadh aca air sin a dhearbhadh. Ach tha fios ’am dé a theireadh Alasdair agam-sa nan tigeadh e dhachaidh gu sliseagan ùbhlán agus bìdeagan arain air an ròstadh!

Bho chionn greise ann an so chaidh sinn a choimhead air an fhéil —thaisbeanaidh mhóir a bha aca ann an Talla Chelbhin—am “Modern Homes Exhibition.” Chaidh sinn ann feuch dé na goireasan ùra a chitheamaid airson an tighe. Is liuthad innleachd fheumail a bha ri fhaicinn—inneal nigheadaireachd a nì nighe ’s fàsadh; inneal sguabaidh is glanaidh a nì ann an tiota an obair a b’ àbhaist dhut leth latha thoirt rithe air do ghlùinean agus ’na do shruth fallais; soitheach còcaireachd anns an gabh biadh ullachadh ann an glé bheag ùine fo chumhachd toite—seadh, soitheach anns an gabhadh eadhon an fhuinne dèanamh. Feumaidh mi iomradh a dhèanamh air àsuig bhig air an do ghabh mi beachd sònraichte. Dùsgidh i thu anns a’ mhaduinn; goilidh i an t-uisge agus cuiridh i air dòigh do chupan tea. Nach bu ghlé ghasda sin ri taobh do leapa air maduinn Sàbaide!

A dh’aindeoin gach nì taitneach air an do bheachdaich sinn, thill sinn, cha mhór, cho lom ’s a dh’fhalbh sinn. Thug sinn dhachaidh, an ainm an Aigh, pocan beag phlanntraisean airson an cur mun dorus. Ach ’s mór m’eagal gur mi fhéin a dh’fheumas tòiseachadh leis an spaid. Abradh sibhse gum bheil Alasdair agus ‘Jake’ MacDhomhnuill a tha an ath dorus dhuinn math air seanachas mu ghàrnalaireachd; chan eil dad air nach eil fios aca—iadsan ’s iad air an togail air an fhearann—agus abradh sibhse gun dean iad fanaid air na Goill a tha mun cuairt seach gun do thòisich iadsan a’ ruamhar ’s a’ taomadh aig deireadh an fhoghair. Ach tha na gàraidhean againne gun dèanamh fhathast, agus leis a’ gheamhradh